


**TEZAUUR LITURGIC**

**31 IULIE**

**SLUJBA  
SF. IERARH-  
MĂRTURISITOR  
VASILE  
PREOBRAJENSKI,  
EPISCOPUL  
KINEȘEMSKULUI  
II**



**MOSCOVA, 2000**



# Служба священноисповеднику Василию епископу Кинешемскому

Стихиры на «Господи, воззвах» – 8, глас 2,  
подобен «Егда от древа»:

Рождество твое, святе Василие,  
Собором Крестителевым знаменуется,  
Се же промыслом указывается Божиим,  
Яко рачителя просвещения являющее тя нам,  
Яко и Маркову благовестию,  
Егоже светлоуяснил еси,  
От Предтечевы начинатися проповеди,  
Паки Спасовой утверждатися:  
Покайтесь и веруйте во Евангелие.

Чиста юность твоя, святе Василие,  
Образ являет степенна усердия,  
От талантов неослабеваема:  
Тако усвояемым дарам ти Божиим,  
Яко всюду во учении первенствуя,  
К вышнему познанию устремляеши,  
Еже во Христе Иисусе:  
Поминая о истинном души восхождении -  
Покаянием и верою во Евангелие.

Многая познав от учения,  
Отдавая учительством, паче сия умножал еси,  
Яко юных воспитанию ти служить изрядно,

Паки, мудре, смиряешися,  
Среде тьмы, нашедшия на Святую Русь,  
По стопам пастыря добра и отца  
Направляеши стезю жизненную,  
Слову Божию сообразную:  
Покайтесь и веруйте во Евангелие.

Не ища земныя хвалы высотой служения,  
Еже Божиим званием возложено ти скоро бысть,  
О посте ревнуя, прилежа в молитве,  
О смятенной пекийся всеусердием пастве,  
Собирая ю состраданием, воспитав словом  
Спасовым,  
Волки мысленныя от тоя изгоняя,  
Не смущен николиже оных дерзостию,  
На первейшем утвержден от Книги Жизненныя:  
Покайтесь и веруйте во Евангелие.

Не преломят тя, Василие, богоборных гонения,  
Не лишат ничесоже нищетою вседовольнаго,  
Но среде утеснений лютых  
От богатств христолюбивыя души  
Созидаеши, яко некий Божественный храм,  
Книгу жизни твоея и славы -  
Беседы о благовестии Маркове -  
Яко во веки пити нам от струи неизсякаемы:  
Покайтесь и веруйте во Евангелие.

Заточения ти, Василие, производят терпение,  
Преселения — духа свободное,  
Разлучения с паствой моления являют силу,

Яко сердцем присных не отдаляешия,  
Вражиих лукавство соблазн – смиренномудрие,  
Паче правды ты ревнителя показывают,  
Представляюща Божие над человеческим  
присно,

Яко дыша воздухом, сим живеши:

Покайтесь и веруйте во Евангелие

Невозможно есть твоя скорби изчислити,

Неудобно сих глубину исследити,

От темниц до изгнания в веси дальния,

От прелюта глада до горчайших работ,

Отягченна леты, Василие, и немощию,

В нейже сила Божия совершается,

В нейже дух от земли удаляется упованием,

Единое содержа сердцу правило:

Покайтесь и веруйте во Евангелие.

скушен, о Василие, по всяческим,

Плотию совершенно умертвился еси,

Ни единого союза с миром тленным оставль,

Всею жизнью диавола поборая,

Богу же вся ти силы отдая,

Се – исходу, святе, приближаешия,

Се – уготовляешия молитвою:

Боже Милостиве, прими, дух мой:

Се бо каюся и живу Евангелием.

Слава, глас 3:

Обнищавый Христа ради на земли, о Василие,

Не остави нищеты нашея о душе,

Чистоту возлюбивый Бога зрящую,  
На пути спасительны настави целомудрием нас,  
Ты - ходатай и упование нам о Господе:  
Поверяем убо, отче, себе предстательству  
твоему.

И ныне: Богородичен 1-й гласа:  
Како не дивимся...

Вход, прокимен дне и чтения 3:

Притчей чтение.

Память праведнаго с похвалами, и  
благословение Господне на главе его. Блажен  
человек, иже обрете премудрость, и смертен,  
иже уведет разум. Лучше бо сию куповати,  
нежели злата и серебра сокровища. Честнейшая  
же есть камней многоценных, все же честное  
недостойно ея есть. Долгота бо дней и лета  
живота в деснице ея, в шуйце же ея богатство и  
слава. От уст ея исходит правда, закон же и  
милость на языке носит. Послушайте убо мене, о  
чада, честная бо реку, и блажен человек, иже  
пути моя сохранит. Исходи бо мои – исходи  
живота, и уготовляется хотение от Господа. Сего  
ради молю вас и предлагаю мой глас сыновом  
человеческим: яко аз, премудрость, устроих  
совет, и разум и смысл аз призвах. Мой совет и



утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научу бо вас истине, да будет о Господе надежда ваша, и исполнитесь Духа.

### Премудрости Соломони чтение.

Уста праведнаго каплют премудрость: устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот, и во благих своих плод правды обымет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость. Любит Господь преподобныя сердца, приятни же ему вси непорочнии в пути. Мудрость Господня просвещает лице разумнаго. Постигает бо желающия ю, прежде даже разумети ю, и удобь

узрится от любящих ю. Утреневавый к ней, не утрудится, и бдяй ея ради, вскоре без печали будет. Яко достойных ея сама обходит ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности моея. И взысках невесту привести себе, яко всех Владыка возлюби ю. Таибница бо есть Божия хитрости, и обретательница дел Его. Труды ея суть добродетели: целомудрию же и разуму та учит, правде и мужеству, ихже потребнее ничтоже есть в житии человеком. Аще же и многого искусства желает кто, весть древняя, и быти хотящая разсмотрит: свесть извития словес, и разрешения гаданий, знамения и чудеса проразумеет, и сбытия времен и лет; и всем советник есть благ, яко безсмертие есть в ней, и благославие во общении словес ея. Сего ради беседовах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим, и мудростию Твоею устроивый человека, да владеет бывшими от Тебе тварьми, и да управляет мир в преподобии и правде. Дажь ми Твоих Престолов приседящую премудрость, и не отлучи мене от отрок Твоих, яко аз раб Твой, и сын рабыни Твоея. Посли ю с Небес от святого



жилища Твоего, и от престола славы Твоея, да сущи со мною научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива, и погрешительна умышления их.

### Премудрости Соломони чтение.

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим, аще и муку примут, упование их безсмертия исполнено. И в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их: и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющийся Нань разумеют истину, и вернии в любви пребудут Ему. Яко благодать и милость в преподобных Его, и посещение во избранных Его.

### Стихиры на литии, глас 8:

Мир во зле весь лежит –/ сего ради праведники не терпит,/ яко стадиями изгоняя тех,/ в

вожделенно им Царство Небесное,/ сию же  
 благую часть от епископства, Василие, восприял  
 еси,/ вопия мысленно с Велемирным  
 Николаем:// никакоже клянусь - благословляю  
 сия./

Страстем Господним поклонение/ многожды  
 молитвенно совершая, о Василие,/ Христову  
 изгнанию приобщаешься,/ от храмов  
 новоневверными отлучен с честною ти паствою,/  
 обаче молитвою стогны града яко святилища  
 явил еси// поднебесным литургисанием  
 благословляя сия./

До Зырянских лесов досягаяща,/ Кострома  
 несильна удержати Василия,/ егоже темница  
 ждет во граде Иоаннове,/ до Урала по заточении  
 паки отсылаема,/ еще же при Рыбинске-граде/  
 летами пятию на работы горькия осуждена,//  
 ничесоже от тех клянущему – благословляющу  
 сия./

Отягчена леты, утруждена болезнями,/ ко  
 исходу тя Котово-село уготовляет тихостию,/  
 Ярыя же славы града темница/ с Лубянкою и  
 Бутыркою лютыми,/ яко вся претерпевшу  
 евангельски до конца,// упокоение мирно,  
 Василие, обручают ти./

Слава, глас тойже:

О страдальче предобре, о Василие  
 святоизгнанниче,/ от земли Сибирския, ты

упокоившия,/ прииди, научи люди новыя,  
святителю,/ / подражая терпением,  
благославити тя.

И ныне, глас тойже:

Вифлеему, затворшему двери Ти, Дево, не  
стужила еси,/ во Египет изгнана, тому вознесла  
еси благословение,/ / по успении паки мира не  
оставляши, Пресовершенная.

Стихиры на стиховне, глас 2,  
подобен «Доме Евфрафов»:

Земле Кинешемская, / возликуй Исаии гласом,/ /  
се бо свет прииде твой,/ /  
слава возсия тебе Господня днесь//  
именем Василия святителя.

Служити Ему/ преподобием и правдою:

Храме Вознесения, /  
новым величайся Златоустом,/ /  
многочастне житием прешедшим/  
древняго многострадально поприще,/ /  
исповедником Василием святителем.

Дати разум спасения /людем Его:

Соборе новомученик со исповедники,/ /  
злато Церкви Русския,/ /  
ясно возблистай таланты днесь/  
подвигом изрядным многоусугублены//  
чуднаго Василия святителя.

Слава:

Христовозванным людем,  
бодрствуем в молитвах,  
се бо вверены Господь/  
неусыпающе ходатаю, //  
исповеднику Василию святителю.

И ныне: О чудесе новаго...

Тропарь, глас 1

Во всю землю Русскую изыде вещание твое,  
яко истаго Евангелия рачителя, / яко пастыря,  
слово житием утвердившаго, //  
священноисповедниче о Василие, чудне отче  
наш. /

**НА УТРЕНИ:**

Седален по 1-й кафизме:

Школу истинную прощед житием и учением, о  
воспитании ревнуеши младости, благочестием  
утверждая верныя земному царю, о премудре  
учителю.

Слава и ныне:

Долготерпеливыми воспитана Иоакимом и  
Анною, паки от ангельския беседы возрастши,  
утверди ны благочестием во смирении  
истиннем, Богородице.

Седален по 2-й кафизме:

В дом отечь по учении возвращься, о  
просвещении ревнуеши народа Божия, еже от  
всяка слова, от Христовых пречистых устен  
исходящаго.

Слава и ныне:

Дом небесный сретает Тя, яко скинию истинну,  
Богомати, егоже достигши, не остави убо сиры  
нас.

Величание: святительское

Седален по полиелее:

Просветителю и наставниче, подвига рачителю,  
благочестия правило, всем ходатай явился еси  
Василие: моли Спаса о нас.

Слава и ныне:

Истину, Путь и Жизнь, Свет явльши миру,  
Богородице Пресвятая, спасай нас.

Прокимен, глас 4: Святым, иже суть на земли  
Его, удиви Господь вся хотения Своя в них

Стих: Предзрех Господа предо мною выну, яко  
одесную мене есть, да не подвижуся.

Евангелие от Матфеа 43 зачало,

Стихира по Евангелии, глас 6:

Святым иже суть на Руси святых,/   
новоисповедником и мучеником/ удиви Господь   
хотение Свое,/ еже Церковь Русскую возродити/

дерзновенным сих ходатайством,/ сего ради о  
земли своей умоляюще,/ священнодивному  
Василию возопиим:// радуйся Кинешемский  
светочу!

Канон, глас 4  
КРАЕГРАНЕСИЕ: Евангелия Христова пою  
толковника вдохновенна Василия  
святоисповедника

Песнь 1

Ирмос: Ли́цы израи́льтести́и, невла́жными  
стопа́ми по́нт Чермный́ и вла́жную глуби́ну  
прогна́вше, вса́дники триста́ты враги́ ви́дяще в  
не́й погруже́ны, с весе́лием по́яху: по́йм Бо́гу  
на́шему, я́ко просла́вился.

**Е**вангельских взыскупя глубин, паству в слове  
Божии наказуеши, о Василие, от апостол и  
святых отец научен, паче же от благодати Духа.

**В**ерую во Евангелие, исполнением того опытно -  
утверждатися научаеши, о Василие, яко благая  
суть миру весть, во тьму погруженному.

**А**ллилуия, слава Боже, Тебе, - восклицаеши  
духом, Василие, святонедосягаемым уязвлен от  
Евангелия образом Всецаря Господа.

**Н**епостижна премудрость, любы неисповедима,  
духа сила необоримая, - истое сие Христово -



возглашаеши, Василие - верным даруются на созидание душ о Господе.

Глас в пустыни вопиющего – ясно слышиши сие, Василие, и возглашаеши -исполняет Слово Отчее Божественное, еже: покайтесь и веруйте во Евангелие.

Единаго на потребу взыскати, в слове утверждатися Божии, наставляеши, отче Василие, да себе отрещися возможем, да наследим Царство.

Любочестно есть скорбей терпение, свидетельствуеши от Евангелия, Василие, - тем бо смирение истое восприимлется, во образ Божественна.

Иисусу Пребожественну во всесвятии руце уготовляеши предати душу, о Дево Пречистая, да соцарствуеши Тому, яко Сыну и Господу.

### Песнь 3

Ирмос: Лу́к си́льных изнемо́же, и немощствую́щий препоя́сашася си́лою, сего́ ра́ди утверди́ся в Го́споде се́рдце моё.

Яко наследник великаго во учителях небеснаго ти покровителя, являеши ся, Василие, созидая в душе истинный храм, лес на сие обрядов пользуя, да обрящеши мзду верна и мудра благодати строителя.

**Х**ристолюбней пастве твоей проповедуеши, отче, неленостне, яко Зиждителем вдохновенна душа на лучшие устроена думы, еяже ради омовения торжества Той уставил есть церковныя.

**Р**ади литургии Божественны причащения и праздники и все житие наше есть, - возглашаеши, отче, - да не устрашимся тоя ради и претерпети до конца вся.

**И** звание восприим ко престолу апостольску, и трудам их причастник являеши ся, Василие, не возносяся отнюд, но яко должник усердствуя.

**С**е учиши ны от Евангелия, отче, яко связаны есмы любви узами вси, яко чада церковная, се же долг, се ответ нам пред Господем.

**Т**окмо да не победимся самостию, упреждаеши ны, о Василие, да не отлучимся благодати от небратолюбия, и, якоже Каин, ничтоже пользуемся.

**О** Спасе тонкое являя сострадание души, зриши убо, отче, Того от сродник уничижаема, о Самосущней Премудрости, яко неистова есть, шепотствующих несмысленне.

**В**олю Небесна Отца пришед исполнити, Спасе, утешаеши верныя, вследствующие Евангелию именуя истинно братиею и сестрами Ти, паки и Материю.

### Седален:

Кинешмы истая сый доброта, Василие, яко некий скимен оставаляеши чадом премудрое Марково толкование, имже питаеми, паки к сему возвращаемся, да от святости твоея насытимся.

### Слава и ныне:

Помоще миру сущи и стена тверда, Пречистая, заступи ны от находящих бед.

### Песнь 4

Ирмос: Услы́шах сла́вное смотре́ние Твое́, Христе́ Бо́же, яко роди́лся еси́ от Де́вы, да от ле́сти изба́виши зову́щия: сла́ва си́ле Твое́й, Го́споди.

**Алчбу** духовную обручает самолюбия камень, не дая утвердиться класу от семени слова Божия, паки поглощает сие терние суеты, аще не возревнуим трудом о земли наших душ, просвещаемы тобою, Василие.

**Пощады** не весть правда Божия, низлагая рубы самоизмышления чловеча, возсиявая нам идеалом евангельским, проповедуемым тобою, Василие.

**Ослабы** не весть христолюбна душа о подвизе, яко труд непрестанен ясноявляет истое духовное житие, егоже и показал еси, симже образом от сна лености встаем, обличаемы тобою, Василие.

**Ю**же избрал еси правду Божию, еяже молитвою держался еси, сию пред соблазны вражиими предпоставил еси изряднее, противу силы темныя ко Господу взывая о себе и чадах духовных, Василие.

**Т**окмо верным о Господе крестоношением, паки же себе вниманием и молением непрестанным противу силы устояти возможем темныя, - се, завет нам отечь, чадом духовным твоим, Василие.

**О**ткровенно свидетельство, исповедание силы Божия, избавляющая зла, всемилующия, николиже оставляющая – се же нам укрепление от словес твоих в уповании духовнем, Василие.

**Л**ицезрение верности, паки и благородныя чести исповедания первомученик восхищает ти, отче, дух, уязвляет же сею памятью и чада духовныя твоя, Василие.

**К** небесным ныне тщишися, Дево, к наднебесным духом воспаряеши, Пречистая, идеже Сын Превечнаго Отца и Твой по человечеству, о Мариам.

## Песнь 5

**Ирмос:** От свѣта пресекий перворо́дный свѣт, я́ко во свѣте дела́ пою́т Тя́, Христе́, Соде́теля, во свѣте Твоёмъ пути́ на́ша напра́ви.

**О** исповедании Афанасиеве, о Дамаскина свидетельстве ликует сия лизезряще ти дух, паки и ревнует, Василие, тем подражанием.

**В**сех времен славолепие исповедание истинно является, паче же мученичество есть, - яснозриши сия, о Василие, - увлекаая с собою и верныя ти к подражанию.

**Н**есть христианства без креста, - свидетельствуеши сия, о Василие: аще Церковь гонима есть – уничижение убо и нам предлежит, да терпение стяжим, образ ведяще твой к подражанию.

**И**споведуеши, Василие, еже есть христианина жизнь: терпит Христос, да терпим и мы, образ ведяще Того к подражанию.

**К**оль великая нужда в подвизе непрестаннем есть, аще и ко исповеданию призвати восхощет Господь, - опытно познаеши, отче, сия - в сем же настави и укрепи ны.

**А**дамантову крепость о Дусе стяжал еси, о Василие, среде люта гонения, оставль совершенный образ, яко да сим укрепиши ны.

**В**едени будете, - рече Господь, - но не себе поведете сами, - от Евангелия проповедуеши, отче, да не гордоумием лжевосхитим самовольне венец истаго исповедания.

Де́ва пер́вее ко Вифле́ему тщи́тся, да Спа́са ро́дит ми́ру плоти́ю, ны́не же ко Ге́фсимани́и те́чет, я́ко да То́му возвра́тит и те́ло, и ду́шу пречи́стыя.

## Песнь 6

Ирмос: Внегда́ скорбе́ти ми́, возопи́х ко Го́споду, и услы́ша мя Бо́г спасе́ния моего́.

Осуществу́яй тайны́ церковны́я и моли́твы, Ду́х живо́творяй и присно́действи́уяй, не я́вляет Ся неради́вей убо ду́ши – се, Васи́лие, ле́ность на́шу у́преждаеши.

Хри́ста Бо́га позна́вше, суд лю́тейший предугото́вляем се́бе, пото́кая грехо́вным стра́стем, я́ко тех ши́роте и глуби́не и си́ле возра́стати я́ве, – малоду́шие на́ше, Васи́лие, обли́чаеши.

Неради́во ме́дление ги́бель ве́чную на́влекает во бра́ни духо́вней, я́ко и во ве́ншей теле́сную убо сме́рть, – сим же о́бразом на́с, о Васи́лие, на моли́тву и тру́ды спаси́тельны воздвизаеши.

Одо́ление вра́га то́кмо во бра́ни совер́шается, да угото́вимся убо к се́й же́ланием, о Го́споде упова́ние полагая́, твои́ми, Васи́лие, утве́ждаеми сло́весы и моли́твами.

Вся́кое о Го́споде де́ло моли́твою совер́шается, па́че же То́го благо́словением: мно́гоча́стне от исто́чника се́го уто́лял еси́ жа́жду духо́вную,



Василие, да не лишимся и мы дерзновения,  
Промыслу вся поверяя Божию.

**Е**лика прелюбезна вся творит победительна сила  
Христова, обаче благоволение Спаса есть, да и  
мы, якоже и апостоли Того, вкупе же и с тобою,  
Василие, части в сем да сподобимся.

**Н**епреложни суть законы Евангельския, по  
нимже Небесное устрояется Царство силою Бога  
Слова, в Немже, яко твари Зиждители, вся  
живут и движутся – дерзновением  
провозглашаеши сия, о Василие тайнозрителю.

**Н**е премолчи, камо отлетаеши, Горлице,  
прегорних како досягаеши, Ластовице? До  
гнезда возношуся Сына Моего – Превечна Орла  
Небеснаго.

### Кондак, глас 6:

Кинешемскую звезду,/ поборника веры  
чистыя,/ просвещения народа ревнителя,/  
Евангелия толковника изрядна,/ верна  
Господеви исповедника,/ царско воистину  
священие,/ / Василия пречудна восхвалим вси./

### Икос:

Где слово твое, о Евангелии согласное, не  
проповедуется, Василие, / где не дивятся  
подвигом твоим,/ где кончина твоя блаженна не  
прославляется,/ - се бо от восток Руси до запад

слышимъ есть верных глас:// славу  
Кинешемскую, святителя чудна да восхвалим  
вси.

### Песнь 7

**Ирмос:** Авраамстии иногда в Вавилоне отроцы  
пещный пламень попраша, пёсньми зывающе:  
отец наших Боже, благословен еси.

**Аллилуиа, осанна** – хвалу воспеша дети Отцу и  
Сыну Его, Духом Святым величие Христа  
возславивше, Емуже словом поклонение воздал  
еси на земли, Василие, Егоже вечно на небесех  
поеси: Боже Царю – благословен еси.

**Вечнующую** обручает гибель непостоянное души  
усердие ко Христу – во трезвении утверждаеши  
верных, Василие, духом лицезря звавших  
«осанна» яростию вопиющих о распятии Спаса  
всех.

**Авраама** вере, Исааковой жертвенности,  
благочестию Иаковлю учит храм, да изгоним zde  
неподобныя помыслы, якоже Спас торгующих,  
наставленьми твоими утверждаеми и  
молитвами, отче Василие.

**Спасу** первее послушанием вдал еси себе, яко  
истый монах, да любовь мученика единишися  
с Ним – сему царску пути наставляеши словом  
убо и житием, о Василие.

**И** тело на подвиги учредив, и душу во святыне утверждаеши, Василие, дея бо учиши о кодранте вдовы евангельския, яже с лептою жития тленнаго верже в Божию сокровищницу сердце свое.

**Лукавнообразен** явлься, неблагодарностию отягчен, окамененное стяжевает нечувствие предатель Христов, - обличаеши Иудовы несытость души, Василие, да сея избегнем, тобою наставляеми.

**И**стая храма доброта ревностен есть ко святыне богомольцев дух: о Василие, сие ощутив, в томже чад о Господе благоговеинством утверждаеши.

**Я**ко предолгая чреда добронравна духа побед является ти от Евангелия святость, юже стяжав, словом, отче, сияеши нам, житием, дерзновением пред Богоматерию.

## Песнь 8

**Ирмос:** В Вавилоне́ о́троцы, божественною распа́еми ре́вностию, мучи́теля и пла́мене пре́щенье мужески попра́ша, и посреде́ огня́ вве́ржени, ороша́еми, пояху: благослови́те, вся дела́ Господня́, Го́спода.

**С**паса образом живым влече тя ко страданию Чаша Господня, да любовию, отче святыи,

положиши душу за искренния, сей же образ в слове оставь нам.

**В**ечерю присно вкушая совершенных таин, велию страданию, отче святыи, приобщаешися о Господе, любовию Того во блаженство ти претворяему.

**Я**ко тягота мучительна беззакония наша вся возлагаются на божественно чистую душу Спасову, сия свидетельствуеши, отче, ужасая благоговейныя.

**Т**ы, возлюбленне Спасе мой, сиянием неповинныя чистоты предстал еси судиям, и мене – сице, отче, взывал еси, - утверди на сие предстояние о благодатнем в Тебе достоинстве.

**О** Незлобиве, – взываеши, святе, - о, Божественный Агнче! Не отверзаяй пречистых устен, молчанием препобеждай вся, и мене на сопротивныя вооружи тишиною духа.

**И**скуплены есте ценою – се, апостол зовет. Се мучительство крестное, непостижная смерть Живота. Се подобная страшная ми предстоят, помышляя еси, отче, - помяни мя тогда убо, Спасе мой.

**С**е Божественный Крест светлоозаряет вся, имже живем, движемся и есмы, словом твоим, страдальче Василие, питаеми, орошаеми твоими молитвами.

Превозмогает вся правда Божия. Се тишайшая сила, неодолимая, юже да восприимем сердцем, Богородицы молитвами.

### Песнь 9

**Ирмос:** Рождество Твое нетленно явися: Бог из боку Твоею пройде, яко плотоносец явися на земли и с человеки поживе. Тя, Богородице, тем вси величаем.

**Образ** подписав Ионы-пророка, обетование исполняет Спас воскресением, паки же ты, Василие-отче, воскрешает с Собою, вся претерпевшу до конца.

**Воскресый** Христос - Бог наш истинен, камень краеуголен веры нашея - исповеданием сим утверди ны, о Василие святоисповедниче.

**Еже** Тя знати, воскресша Христа - се, нетщетная вера наша, Спасе, се Василий пресладко учит, яко несть христианства вне сего исповедания.

**Да** превозмогут зло благостыня и правда, - се являет сия воскресый Христос - се во веки поеши Ему песнь победну, Василие.

**Ныне** Спаса востанием торжествует над смертью жизнь, - о сем возвещал еси, Василие, сия убо во веки лицезриши.

**Иисуса** востанием Христа и Господа новая убо даруется нам жизнь, исполнь благодатныя силы,

да тоя приобщимся, словом твоим и образом,  
Василие, вдохновляеми чудными.

**К** наднебесным возшед, предстоит Отцу за ны  
воскресый Христос, да Ему возследуем от земли  
по стопам святых.

**Аллилуиа** поем, слава Боже, Тебе! Небеснаго  
Царства отверзаются убо и нам врата  
восстанием Спасовым, Богородицы  
предстательством, новомученик молитвами.

### **Светилен:**

Просветися земля Кинешемская словом и  
подвигом твоим, не остави убо сию, святе  
Василие, заступлением отчим.

Слава и ныне:

Небо и земля просветися, Дево, Рождеством  
Твоим, не лиши убо нас Твоего заступления,  
Мати.

На хвалитех стихиры 4, глас 5,  
подобен «Радуйся»:

Радуйся, Василие, пресиятельно,/   
Тезоименным ти светочем соблистаяй:/   
Декаполиту возследуяй исповеданием,/   
Руси крестителю ревностию о просвещении,/   
Новопреподобнаго восприемый тайнозрение,/   
Нищету возлюбивый блаженна Московска,/   
Пастырю Рязанску подобяся многочастным



изгнанием,/   
Острожску же святителю терпением утеснений   
всяческих, //   
Великому ти покровителю - преизобилием даров.

Радуйся, церковных витий доброта,/   
Радуйся, толковник божественных украшение,/   
Древним и новым яснозрительне   
уподобивыйся:/   
Афанасию и Кириллу постижением евангельских   
таин,/   
Яко и тем согласну священномученику   
Григорию,/   
Глубиною видения Филарету всемудру,/   
Вышенску затворнику к путям спасения   
обращению,/   
Феофилакту же широтою познания, //   
Златоуста наследуя преизобилие даров./

Радуйся, Василие, пречудне,/   
Нищеты смиренны духа преисполненне,/   
От неяже плач восприим со кротостию,/   
Алчбу правды милостию насыщая,/   
Богозрящей чистотою миротворствуя,/   
О клеветах и изгнаниях агнче пренезлобиве,/   
Радуйся же паки, пастырю наш, и веселися,/   
Лествицею блаженств возшедый в горняя, //

Идеже Троицы наслаждаешия преизобилием даров./

Радуйся, новым мучеником и исповедником  
сопричастниче,/   
Кротноименну Никодиму – от обща учения,/   
Соузы изгнания Кириллу всецерковному  
светочу,/   
Александру же Семипалатинску сослужением,/   
Преискренним согласиём Афанасию  
гимнотворцу,/   
Добру ангелу Ярославския церкви –   
единодушием,/   
Предстоятелю отец даниловских –   
благопослушанием,/   
Благословением же отеческим Ираиде  
тишайшей, //   
Максиму блаженну ревнованием больших  
даров./

Слава, глас 6:

Сострадательныя трудники/ Александра со  
Ираидою/ с собою к подвигу привлекл еси,/ и  
нас ко спасению тесным стезям,/ ясным  
образом твоим, о Василие, // паки словом и  
молитвами привлещи./

И ныне, глас тойже:

Богородице, Ты еси лоза истинная,/   
возрастившая нам Плод живота,/ Тебе молимся:

молися, Владычице,/ с новомученики и  
исповедники,/ / помиловатися душам нашим./

